

AHLI SUNNAH PERLIS: KELAHIRAN DAN PERKEMBANGANNYA

oleh
Zakaria @ Mahmood Daud

Abstract

The article tries to make a detail description of Ahl al-Sunnah wa al-Jama'ah of Perlis which is said to adhere only to the Quran, Sunnah Rasulullah and the opinion of the ulama of salafus-salleh and does not commit itself to any of the existing mazhab. It is also an attempt to trace its development from its early period to the present moment, its founders and the main supporters. The movement has made its attempt to spread its particular concept of Ahl al-Sunnah to other states in Malaysia

Pendahuluan

Ramai orang bertanya mengapa Ahl al-Sunnah wa al-Jama'ah di Negeri Perlis tidak sama dengan Ahl al-Sunnah wa al-Jama'ah di negeri-negeri lain di Malaysia. Dikatakan mereka tidak mengikut mazhab Syafie. Cara fahaman mereka mengenai tauhid tidak sama dengan yang dipegang oleh golongan yang bermazhab Syafiee, begitu juga cara bersembahyang, cara mengambil wudu', hal-hal pengurusan orang mati dan lain-lain lagi juga ada sedikit perbezaan dengan apa yang dilakukan oleh golongan yang mengikut mazhab Syafi'e. Kerana itu orang ramai bertanya-tanya, apakah sebenarnya Ahl al-Sunnah wa al-Jama'ah Perlis? Mengapa mereka berbeza dengan Ahl al-Sunnah yang lain? Bagaimana kelahiran dan perkembangannya? Bagaimana akidah dan amalan-amalan mereka dan sebagainya. Dalam jurnal ini penulis hanya ingin menjelaskan pengenalan Ahl al-Sunnah wa al-Jama'ah Perlis dan perkembangannya sahaja. Manakala mengenai akidah dan ajaran serta amalan mereka akan diulas dalam artikel yang lain.

Pengenalan Ahl al-Sunnah Perlis

Setelah dibuat kajian didapati golongan Ahl al-Sunnah wa al-Jama'ah Perlis dikatakan sebagai kumpulan orang Islam yang berpegang kepada al-Quran dan sunnah Rasulullah s.a.w., pendapat para sahabat dan pendapat para ulama salafus-saleh serta ulama terkemudian seperti Ibn Taimiyyah dan lain-lain dan mereka tidak bertaklid kepada mana-mana mazhab tertentu.

Ustaz Othman bin Muhammad salah seorang Ahl al-Sunnah Perlis sewaktu membenteng konsep ahl al-Sunnah wa al-Jama'ah Perlis kepada pegawai-pegawai masjid pada tahun 1988 beliau ada menyebut perkara di atas, katanya:

*"Ahl al-sunnah ialah suatu kumpulan atau golongan orang Islam yang berpegang kepada ajaran al-Quran dan sunnah seperti mana amalan yang dilakukan oleh para sahabat dan tabi'in tanpa melakukan bid'ah."*¹

Dalam buku kecil keluaran Majlis Agama Islam dan Adat Istiadat Melayu Perlis ada menjelaskan perkara ini dengan panjang lebar, katanya:

*"Ahl al-sunnah ialah suatu kumpulan orang-orang Islam yang berpegang kepada al-Quran, sunnah dan pendapat para sahabat dan sunnah Rasulullah s.a.w. Majlis (Agama) tidak terikat kepada mana-mana satu mazhab tertentu. Di dalam mazhab manapun yang jelas dan nyata pendapat mereka itu dari kitab Allah (al-Quran) atau sunnah RasulNya atau jamaah sahabat kami berpegang dengannya. Adapun mazhab-mazhab seperti Hanafi, Maliki, Syafie dan Hanbali pada pandangan rasmi Majlis adalah terhitung di dalam mazhab-mazhab yang muktabar yang tergolong dalam istilah Ahl al-Sunnah wa al-Jama'ah. Majlis Agama Islam Perlis memang berpandu kepada mazhab-mazhab itu dan mengambil pendapat-pendapat mereka yang ada alasan daripada al-Qur'an, sunnah dan Jama'ah sahabat Rasulullah s.a.w."*²

Majlis Agama Islam Perlis menjelaskan maksud Ahli Sunnah wal Jamaah seperti di atas berdasarkan kepada beberapa ayat al-Quran dan hadis Rasulullah s.a.w., antaranya:³

Firman Allah Taala:⁴

¹ Othman bin Muhammad, *Konsep Ahli Sunnah wal Jamaah*, Kertas Kerja dibenteng dalam Kursus Pegawai-pegawai Masjid Negeri Perlis, (1988), hlm. 4.

² Majlis Agama Islam dan Adat Istiadat Melayu Perlis, *Keputusan Fatwa Mengenai Ahli Sunnah wal Jamaah*, hlm. 1-2.

³ *Ibid.*, hlm. 2-3.

⁴ Surah al-Anam, ayat 153.

وَأَنَّ هَذَا صِرَاطِي مُسْتَقِيمًا فَاتَّبِعُوهُ وَلَا تَتَّبِعُوا السَّبِيلَ فَتَفْرَقَ بِكُمْ
عَنْ سَبِيلِي ۚ ذَٰلِكُمْ وَصَّاكُم بِهِ لَعَلَّكُمْ تَتَّقُونَ ﴿١٥٢﴾

“Sesungguhnya ini adalah jalanku yang lurus, maka ikutilah dia dan jangan kamu mengikut jalan-jalan lain kerana yang demikian itu diperintahkan oleh Allah kepada kamu agar kamu bertakwa.”

Dan sabda Nabi s.a.w.:⁵

خير الناس قرني ثم الذين يلونهم ثم الذين يلونهم يأتيء آمن بعدهم قوم
يتسمنون ويحبون السمن يعظون الشهادة قبل ان يسألوها

“Sebaik-baiknya manusia ialah (yang hidup) dikurunku (di zaman Nabi s.a.w. dan sahabatnya), kemudian mereka yang datang sesudahnya (zaman tabiin) kemudian di zaman mereka yang datang sesudah mereka itu (zaman tabi' al-tabi'in) dan sesudah itu datanglah zaman orang yang suka berbohong dan janganlah kamu bergantung (berpegang) kepada perkataan dan perbuatan mereka.”

Dari sini jelaslah bahawa Ahl al-Sunnah wa al-Jama'ah Perlis ialah kumpulan umat Islam yang mengikut ajaran al-Quran dan sunnah berpandukan kepada tafsiran dan penjelasan ulama-ulama dari berbagai-bagai mazhab dan mereka tidak terikat kepada sesuatu mazhab Ahli Sunnah tertentu, mereka tidak terikat kepada mazhab Syafie umpamanya atau kepada mazhab Hanbali atau sebagainya. Mereka menerima pakai mana-mana sahaja pendapat mazhab empat yang disokong oleh dalil yang kuat. Ini bererti mereka tidak menolak pendapat imam-imam mazhab empat, bahkan mereka tetap menyokongnya.

Perkembangan Ahl al-Sunnah Perlis

Jika dikaji mengenai kedudukan dan perkembangan golongan Ahl al-Sunnah Perlis, kita boleh membahagikan kepada beberapa peringkat perkembangan seperti berikut:

1. Peringkat Pembentukan

Jika dilihat kepada peringkat pembentukan Ahl al-Sunnah Perlis, didapati penggunaan istilah tersebut diguna kepada golongan yang terpengaruh kepada

⁵ Ibn Hajar al-Asqalani, *Fath al-Bari Syarh Sahih al-Bukhari*, Jld. 7, (Dar al-Fikr, t.t.), hlm. 3.

gerakan *Islah* atau reformasi Islam yang lahir di seluruh dunia Islam sebelum itu, mereka kadang-kadang digelar kaum muda dan ada ketikanya disebut golongan *Islah*.⁶ Aliran ini muncul di Perlis bukan secara tiba-tiba tetapi mempunyai susur-galur sejarah yang tersendiri sehingga diterima oleh sekelompok masyarakat Perlis dan seterusnya dikanunkan dalam undang-undang tubuh kerajaan negeri Perlis serta dijadikan sebagai satu aliran rasmi umat Islam di negeri tersebut.⁷

Satu hakikat yang perlu disedari walaupun aliran ini telah berkembang lama di Perlis, namun begitu sebahagian besar masyarakat Islam di Malaysia termasuk di bahagian selatan negeri Perlis sendiri masih tidak jelas mengenai gagasan yang hendak diterapkan. Keadaan ini menjadi lebih kronik lagi apabila sebahagian umat Islam tidak dapat menerima konsep dan ajaran yang disampaikan dan yang lebih malang lagi ada yang menuduh golongan ini sebagai kumpulan yang menyeleweng kerana mereka tidak terikat dengan mana-mana mazhab.⁸

Sebelum kemunculan gerakan *Islah* atau Ahl al-Sunnah wa al-Jama'ah Perlis, negeri itu sama seperti negeri-negeri lain di Nusantara yang mana masyarakat Islam pada umumnya mengikut aliran *Syafi'eyyah*. Di Perlis sendiri aliran *Syafi'eyyah* yang berkembang sebelum itu ada hubungannya dengan faktor kepimpinan tempatan yang mana sebelum itu tokoh-tokoh pembesarnya berasal dari keturunan Hadramaut yang memang terkenal sebagai pendokong mazhab *Syafie* yang setia.⁹ Dengan itu mulai dari zaman Qadi Besar Perlis yang pertama iaitu Syed Muhammad al-Haddad dan diikuti oleh Haji Muhammad bin Abdul Latif dan Haji Muhammad Noor bin Haji Muhammad dan pimpinan-pimpinan besar lain adalah dipegang oleh tokoh-tokoh aliran *Syafi'eyyah*.¹⁰

Bagaimanapun, fenomena ini tidak kekal lama, akhirnya berubah sekitar tahun 1920-an dengan munculnya gerakan pembaharuan dalam agama oleh tokoh-tokoh Islam atau tokoh-tokoh aliran *La Madhabiah* (yang tidak terikat kepada mana-mana mazhab) menyeru orang agar berpegang kepada al-Qur'an dan Sunnah.

Tidak ada pendapat sah siapakah tokoh yang mempelopori gerakan *Islah* di Perlis. Ada beberapa pendapat dikemukakan, di antara lain disebut bahawa tokoh

⁶ Temubual dengan Ustaz Nordin Ismail, 4 Mei 1995.

⁷ Akan dihuraikan dengan lebih panjang selepas ini.

⁸ Dari pengamatan penulis ketika membuat kajian bulan Mei 1995 dan Mei 1996.

⁹ Mahayuddin Haji Yahya, *Sejarah Orang Syed di Pahang*, (Kuala Lumpur: Dewan Bahasa dan Pustaka, 1984), hlm. 4, dan hlm. 7.

¹⁰ Abdul Rahman Haji Abdullah, *Gerakan Islah di Perlis Sejarah dan Pemikiran*, (Kuala Lumpur: Penerbitan Pena Sdn. Bhd., 1989), hlm. 21.

yang dianggap memelopori gerakan kembali kepada al-Qur'an dan Sunnah ini ialah Syeikh Hassan seorang ulama pengikut Syeikh Muhammad Ibn Abdul Wahhab (dituduh ulama *Wahhabi*) datang dari Mekkah. Dr. Harun Din dalam kajiannya menyebut bahawa tokoh pertama melahirkan aliran Ahl al-Sunnah di Perlis ialah Syeikh Hassan berasal dari Arab Saudi. Beliau datang ke Perlis pada tahun 1345H bersamaan 1927M kedatangannya tepat pada waktu pembesaran Perlis sedang mencari tokoh yang boleh membawa perubahan seperti yang berlaku di Arab Saudi. Pendapat ini berdasarkan kepada catitan peribadi Wan Ahmad Wan Daud seorang tokoh Islah Perlis.¹¹

Kerajaan Negeri Perlis membenarkan Syeikh Hassan mendirikan sebuah sekolah Arab untuk mengajar kelas agama. Beliau berusaha untuk menghapuskan bid'ah dan menerangkan kepada umat Islam bahawa pintu ijihad sentiasa terbuka. Di samping itu beliau juga tidak mengharuskan bertaqlid kepada mazhab Syafie. Oleh sebab fahaman Syeikh Hassan dianggap sebagai fahaman kaum muda, sekolah yang diasaskan tidak mendapat sambutan penduduk tempatan. Beliau kemudiannya berpindah ke Paya dan mengajar agama di sana pada tahun 1930-an, kemudian beliau berpindah ke Pulau Pinang dan meninggal dunia di Jelutong.¹²

Manakala dalam buku cenderamata "Ijtimak al-Sunnah kedua tahun 1988" anjuran Persatuan al-Islah Perlis mencatatkan bahawa fahaman Sunnah di Perlis telah berkembang semenjak tahun 1920-an. Ia dibawa dan dipelopori oleh Lebai Kechik dari Indonesia. Pada peringkat awal kedatangan, beliau ditentang oleh penduduk tempatan dengan hebatnya kerana mereka merasakan tradisi keagamaan yang diamalkan begitu lama dengan mengikut mazhab (Syafie) dikira tergugat. Walaupun begitu ada juga beberapa orang tertentu sudi datang mempelajari pelajaran *al-Sunnah* daripada beliau sehinggalah beliau meninggal dunia di Perlis.¹³

Tetapi menurut Shukur Ahmad yang pernah menjadi Setiausaha Persatuan *al-Islah* Perlis menyatakan faktor di atas tidak tepat. Beliau meletakkan Lebai Kechik sebagai tokoh kedua selepas Syeikh Hassan ini kerana Lebai Kechik datang pada tahun 1930-an dan meninggal dunia di Kampung Behor Masjid, Simpang Empat, Perlis.¹⁴ Sedangkan Syeikh Hassan datang pada tahun 1927 lagi. Jadi nampaknya

¹¹ Dr. Harun Din, *Sejauhmanakah Perbezaan Amalan Keislaman Yang Terdapat di Negeri Perlis yang Tidak Bermazhab*, Kajian Ilmiah (tidak dicetak) (Bangi : Jabatan Syariah, Universiti Kebangsaan Malaysia, t.t.), hlm. 6.

¹² Temubual dengan Hj Salleh bin Hj Abdullah, pada 9.5.1996.

¹³ Buku Cenderamata, *Ijtimak As-Sunnah Kedua*, Anjuran Persatuan al-Islah Perlis, (1988), hlm. 10.

¹⁴ Temubual dengan Hj Salleh bin Hj Abdullah pada 9.5.1996.

pendapat Dr. Harun Din yang mengatakan Syeikh Hassan yang mula memperkenalkan Sunnah di Perlis adalah lebih tepat.

Selain daripada tokoh di atas, pada peringkat awal ini, terdapat juga seorang anak tempatan Perlis yang lahir dan mendapat pendidikan di Mekah iaitu Haji Ahmad bin Haji Muhammad, seorang Hakim Besar Negeri yang lebih terkenal dengan nama Haji Ahmad Hakim yang dikatakan telah terpengaruh dengan gerakan *Wahhabi*. Atas cadangan beliau akhirnya kerajaan Perlis memunggut zakat padi dan menyelaraskannya dengan baik.¹⁵

Di samping Haji Ahmad Hakim ada lagi tokoh-tokoh tempatan seperti Wan Ahmad bin Wan Daud dan Syeikh Ahmad bin Mohd Hashim mereka merupakan tokoh tiga serangkai di Perlis yang lebih dikenali dengan nama julukan "*Tiga Mar*". Mengenai Wan Ahmad bin Wan Daud beliau merupakan seorang tokoh yang disegani dan terpengaruh kepada gerakan *Islah* yang dibawa oleh A. Hassan Bandung, seorang tokoh utama "*Persatuan Islam*" (*Persis*) dari Bandung yang banyak terpengaruh kepada Faqih Hashim yang menganut fahaman *Wahhabi*.¹⁶ Banyak buku agama terbitan *Persis* dipesan terus dari Bandung.

Satu lagi tokoh yang dianggap paling popular bagi gerakan *Islah* atau Ahl al-Sunnah Perlis ialah Syeikh Abu Bakar al-Ashaari bekas penuntut Universiti al-Azhar Mesir sepanjang tahun 1925 hingga 1932. Sewaktu jangkamasa beliau berada di Mesir itu merupakan zaman-zaman akhir bagi Muhammad Rasyid Ridha iaitu seorang tokoh *Islah* terulung di Mesir ketika itu. Sekembali beliau ke Pulau Pinang, beliau mengajar orang ramai pelajaran agama Islam di samping menulis di dalam "*Akhbar Saudara*" keluaran Syed Syeikh al-Hadi. Atas usaha dan inisiatif "*Tiga Mar*" yang tersebut di atas, Syeikh Abu Bakar kemudiannya di bawa ke Perlis pada tahun 1935. Pada mulanya beliau ditugas mengajar di Madrasah Alwiyyah, tetapi memandangkan peranannya di situ agak terhad lalu beliau ditukarkan bertugas sebagai Imam Besar Negeri (Masjid Alawi). Melalui khutbah-khutbah Jumaat, suaranya semakin nyaring menyeru umat Islam agar berpegang kepada al-Quran dan Sunnah. Dan antara tindakan yang mula-mula dilakukan ialah menghentikan amalan memukul beduk di masjid tersebut.¹⁷

Pemikiran Syeikh Abu Bakar al-Ashaari adalah berbeza dengan ulama-ulama lain. Beliau telah meneroka satu pemikiran aliran yang baru pada zamannya. Apa yang diutarakan oleh Syeikh Abu Bakar al-Ashaari adalah penerokaan dalam

¹⁵ Abdul Rahman bin Hj Abdullah, *op.cit.*, hlm. 22.

¹⁶ Dr. Syafik A. Mughni, *Hassan Bandung Pemikir Islam Radikal*, (Pt. Bandung Ilmu Surabaya, 1994), hlm. 15.

¹⁷ Abdul Rahman bin Haji Abdullah, *op.cit.*, hlm. 23.

bidang ijtihad iaitu pengambilan hukum-hukum agama daripada al-Quran dan Sunnah tanpa bertaqlid kepada mazhab tertentu. Konsep ini juga disentuh oleh ulama sebelumnya, seperti Sheikh Tahir Jalaluddin, Syed Syeikh Al-Hadi dan lain-lain.¹⁸

Sebenarnya keadaan gerakan *Islah* di Perlis dari awal sehingga ke zaman kedatangan Jepun adalah dalam peringkat pembentukan. Dan sumber pemikirannya meskipun ada dikatakan pengaruh *Wahhabiyyah* pada mulanya, tetapi ada juga sumber yang mengatakan ia berasal dari ajaran A. Hassan Bandung dan Syeikh Abu Bakar al-Ashaari. Dari ajaran dan tulisan kedua-dua tokoh inilah yang mewarnakan aliran *Islah* di Perlis sehingga muncul kemudiannya apa yang dinamakan golongan Ahl al-Sunnah wa al-Jama'ah Perlis.¹⁹

2. Peringkat Kebekuan

Akibat pendudukan tentera Jepun di Tanah Melayu 1941-1945, maka gerakan Ahl al-Sunnah Perlis turut terancam dan mengalami kebekuan. Perkara ini berlaku kerana beberapa orang tokoh *Islah* yang memainkan peranan pada peringkat awal tadi disisih dan dibuang kerja oleh pihak Raja Perlis yang baru Raja Syed Hamzah yang dilantik oleh pihak Jepun selepas berlaku perebutan kuasa.²⁰

Di antara tokoh-tokoh pembesar yang termasuk dalam senarai musuh-musuhnya ialah Haji Ahmad bin Muhammad, bekas Hakim Besar dan juga tokoh ulama Jabatan Zakat dan Fitrah Perlis. Khabarnya beliau pernah ditahan oleh pihak Jepun, tetapi kerana kekurangan bukti tentang penglibatannya menentang Jepun, beliau dilepaskan. Dan bagi menampung hidupnya beliau berniaga kecil-kecilan di samping berniaga lembu.²¹ Tentang Wan Ahmad Wan Daud beliau dikatakan berniaga lembu secara pawah serta mengisar padi. Manakala Syeikh Abu Bakar al-Ashaari pula beliau terpaksa berpindah ke Kedah dan berniaga di Pekan Rabu Alor Setar. Antara jenis perniagaannya ialah membeli dan menjual beras serta berulang alik ke Padang Besar untuk mendapatkan gula.²²

Tokoh-tokoh tersebut di samping merupakan tokoh penting dalam pentadbiran negeri Perlis sebelum itu, mereka juga merupakan tokoh-tokoh *Islah* yang ulung. Mereka dimusuhi oleh Raja Hamzah kerana dianggap menghalang

¹⁸ *Ibid.*, hlm. 108.

¹⁹ *Ibid.*, hlm. 109

²⁰ Cenderamata Jubli Perak Pemerintahan DYMM Tuanku Raja Perlis, (1971), tanpa halaman.

²¹ Keterangan Ustaz Noordin Ismail, Anggota Majlis Fatwa Negeri Perlis, di rumahnya di Jalan Tok Peduka, Kangar, Perlis pada 5.5.1995.

²² Abdul Rahman Haji Abdullah, *op.cit.*, hlm. 25-26.

baginda dari mendapat haknya sebagai bakal Raja Perlis juga kerana ajaran dan aliran perjuangan mereka itu dianggap sesat dan menyeleweng.²³

Walau bagaimanapun seorang lagi tokoh *Islah* iaitu Syeikh Ahmad bin Mohd Hashim tidak disingkirkan. Pada masa pemerintahan Jepun beliau telah dilantik sebagai Pengerusi Lembaga Bandaran Kangar, di samping masih tetap sebagai pemeriksa kira-kira di Jabatan Zakat dan Fitrah Perlis. Walaupun beliau tidak dapat berbuat apa-apa dalam usaha mengukuhkan aliran *Islah* kerana beliau tinggal seorang diri dan terpisah dari teman-teman yang lain, tambahan pula Syed Hamzah sebagai Raja Perlis waktu itu tidak menyenangi aliran baru itu.

Kerana sebab-sebab di atas gerakan *Islah* Perlis waktu penduduk Jepun mengalami kelumpuhan di peringkat pertumbuhannya sedangkan sebelum itu pembesar-pembesar tersebut mendapat kebebasan dan tidak mendapat bantahan dari Raja Syed Alwi. Maka apabila tokoh-tokoh tersebut diketepikan, dan yang ada pun tidak dapat berbuat apa-apa menyebabkan gerakan *Islah* yang mula bertunas itu tidak dapat tumbuh dengan baik, malah ia terus beku dan terbantut sepanjang zaman pemerintahan Syed Hamzah merajai negeri Perlis.²⁴

3. Peringkat Perkembangan dan Terakhir

Setelah pihak Inggeris kembali semula menjajah Tanah Melayu pada tahun 1945, Raja Syed Hamzah melarikan diri ke Setol. Kemudian ke Pulau Pinang dan akhirnya ke Alor Setar dan mangkat di situ. Pihak Inggeris kemudiannya memanggil balik Raja Syed Putra yang melarikan diri ke Kelantan dan tinggal di sana bersama isteri dan keluarganya. Syed Putra disahkan menjadi Raja Perlis oleh pihak Inggeris pada 4 Disember 1945. Dengan kenaikan Syed Putra sebagai Raja Perlis, gerakan *Islah* mula pulih dan lebih mantap kedudukannya. Di antara faktor berlaku demikian kerana tokoh-tokoh "*Tiga Mat*" (Haji Ahmad Hakim Wahab Ahmad bin Wan Daud dan Syeikh Ahmad bin Mohd Hashim) di lantik sebagai Ahli Majlis Negeri.²⁵ Apabila Majlis Agama Islam dan Adat Istiadat Melayu Perlis ditubuhkan pada tahun 1948, Haji Ahmad Hakim dilantik sebagai Yang Di Pertuannya yang pertama, di samping meneruskan tugas sebagai pengerusi Jabatan Zakat dan Fitrah, manakala Wan Ahmad di samping dilantik sebagai Ahli Majlis Agama Islam Perlis beliau ditugas sebagai pemeriksa kira-kira

²³ *Ibid.*, hlm. 26.

²⁴ *Ibid.*, hlm. 27.

²⁵ *Ibid.*

bagi jawatankuasa zakat dan fitrah dan Syeikh Ahmad turut dilantik menjadi setiausaha jawatankuasa tersebut.²⁶

Dengan kedudukan tokoh-tokoh gerakan Islam dilantik menjadi pemimpin pentadbiran kerajaan dan juga hal ehwal Agama Islam Perlis, memudahkan lagi bagi mereka melaksanakan program pembaharuan agama di Perlis. Misalnya dalam soal perantikan imam-imam masjid, guru-guru agama dan sebagainya, mereka boleh mengutamakan orang-orang yang beraliran *Islah*.²⁷

Selain itu kerajaan Perlis mengadakan jawatan Inspektor agama yang bertugas memberi laporan kepada Yang Dipertua Majlis Agama Islam tentang perkara-perkara berikut.²⁸

- a. Kebajikan Masyarakat.
- b. Perhubungan Keluarga.
- c. Peraksanaan Peraturan-peraturan Agama.
- d. Pengetahuan agama di kalangan masyarakat.
- e. Keadaan tempat-tempat ibadat.
- f. Aktiviti ketua-ketua agama di sesuatu kawasan.

Dengan adanya Inspektor Agama yang mengawal aktiviti-aktiviti keagamaan di sesuatu tempat memudahkan pihak Majlis Agama Islam menjalankan program. Sekiranya terdapat sebarang tindakan yang bercanggah dengan polisi Majlis, pihak majlis akan cuba mengatasi dan menyelesaikan melalui kuasa yang ada. Dengan pengawasan sedemikian aliran *Islah* dapat ditingkatkan dan aliran mazhab dapat dikurangkan.

Satu lagi faktor yang dianggap penting ke arah penonjolan gerakan *Islah* atau Ahl al-Sunnah Perlis ialah peranan yang dimainkan oleh Syeikh Abu Bakar al-Ashaari. Beliau dipanggil pulang oleh Haji Ahmad Hakim sendiri bagi memegang jawatan lamanya sebagai Imam Besar Masjid Alawiyyah. Beliau tidak putus-putus mengajak orang ramai mengamalkan sunnah, menjauhi bid'ah dan taklid. Bagi masyarakat Perlis ketika itu mereka dapat menerima ajaran-ajarannya tanpa banyak bantahan, tetapi selepas mengeluarkan fatwa mengharuskan makan

²⁶ *Ibid.*

²⁷ *Ibid.*, hlm. 28-29.

²⁸ *Ibid.*, hlm. 28-29.

biawak,²⁹ masyarakat menjadi gempar dan kecaman-kecaman terhadapnya mula meletus.³⁰

Hasil dari usaha tokoh-tokoh *Islah* yang berterusan, maka negeri Perlis muncul sebagai satu-satunya negeri di Malaysia yang kuat berpegang kepada aliran *Islah* lebih-lebih lagi apabila beberapa orang tokohnya memasuki bidang politik dan menang dalam pilihanrayanya. Wan Ahmad bin Wan Daud setelah menang dalam pilihanraya tahun 1959 dilantik sebagai speaker pertama di Dewan Undangan Negeri Perlis dan Syeikh Ahmad bin Hashim pula dilantik menjadi Menteri Besar Perlis yang pertama melalui pilihanraya. Menteri Besar sebelumnya ialah Dato Laksamana Haji Mohd Razali bin Haji Ali Wasi.

Pada zaman Dato Laksamana Haji Mohd Razali menjadi Menteri Besar beliau memasukkan pegangan Ahl al-Sunnah ke dalam undang-undang tubuh kerajaan negeri Perlis tahun 1959, iaitu pada perkara 17 yang menetapkan bahawa seorang raja yang akan dilantik hendaklah beragama Islam yang beraliran "Ahl al-Sunnah wa al-Jama'ah".³¹ Demikian juga untuk melantik seorang Pemangku Raja atau Jemaah Pemangku Raja haruslah juga beraliran "Ahl al-Sunnah wa al-Jama'ah" (Perkara 3: 1). Dan dalam menetapkan syarat seseorang waris diraja, dia hendaklah juga beraliran "Ahl al-Sunnah wa al-Jama'ah" (Perkara 27).³²

Tokoh-tokoh yang menandatangani Undang-undang Tubuh Kerajaan Perlis pada tahun 1959 itu ialah seperti berikut:³³

1. Syed Hussin bin Syed Zain Jamalullail (wakil Raja).
2. Dato Laksamana Haji Mohd Razali bin Haji Ali Wasi (Menteri Besar).
3. Haji Ahmad bin Haji Mohammad (Yang Dipertua Majlis Agama Islam dan Adat Istiadat Melayu Perlis).
4. Wan Ahmad bin Wan Daud (Ahli Majlis Negeri).
5. Syeikh Ahmad bin Mohd Hashim (Ahli Majlis Negeri).

Sewaktu Syeikh Ahmad bin Mohd Hashim menjadi Menteri Besar, usaha-usaha semakin giat dilakukan untuk memperkukuhkan aliran "Ahli Sunnah wal Jamaah" ini, umpamanya pada tahun 1963 terdapat satu peruntukan undang-

²⁹ Yang dimaksudkan dengan biawak di sini ialah Dhab, sejenis biawak di padang pasir seperti di Arab Saudi yang ada hadis mengharuskannya. Temubual dengan Ustaz Noordin Ismail di rumahnya pada 5.5.1995.

³⁰ Temubual dengan Ustaz Noordin Ismail di rumah pada 5.5.1995.

³¹ Abdul Rahman bin Haji Abdullah, *op.cit.*, hlm. 36. Ahli Sunnah di sini ialah Ahli Sunnah ala Perlis.

³² *Ibid.*, hlm. 36.

³³ *Ibid.*, hlm. 36-37.

undang Pentadbiran Agama Islam menegaskan, (4) Majlis Agama Islam Perlis apabila mahu mengeluarkan fatwa dan jawatankuasa Syariah memberi pendapatnya di bawah cerai (2), maka hendaklah badan itu mengikut al-Quran dan sunnah Rasulullah s.a.w.³⁴

Seterusnya pada tahun 1964 Syeikh Ahmad memerintahkan Tunku Yaakub yang menjadi penasihat Undang-undang Negeri Perlis masa itu supaya membuat draf mewartakan "Ahli Sunnah wal Jamaah" sebagai aliran pegangan di Perlis. Undang-undang Negeri Perlis perkara 5(1) tercatat:

*"Agama bagi Negeri (Perlis) ialah Agama Islam Ahli Sunnah wal Jamaah seperti yang telah diamalkan di dalam Negeri."*³⁵

Dari segi fatwa yang hendak dikeluarkan di Perlis, dalam Undang-undang Pentadbiran Agama Islam Perlis, 1964, Bahagian 2, Cerai (4) ada mencatatkan:

*"Tatkala Majlis mengeluarkan satu fatwa dan jawatankuasa Syariah memberi pendapatnya, maka hendaklah badan itu mengikut al-Quran dan Sunnah Rasulullah s.a.w. Tetapi sekiranya pendapat atau alasan-alasan itu berlawanan dengan faedah umum, maka majlis dan jawatankuasa Syariah hendaklah memersembahkan fatwa dan pendapat itu kepada Raja pemerintah untuk mendapatkan keputusan. (5) Pada mengeluarkan suatu fatwa di bawah fasal ini Majlis hendaklah mengambil ingatan terhadap Adat Istiadat Melayu yang terpakai dalam Negeri Perlis."*³⁶

Jadi dengan terkanunnya aliran "Ahl al-Sunnah wa al-Jama'ah" seperti yang disebut di atas, maka negeri Perlis dengan rasminya tidak terikat dengan mana-mana mazhab samada Syafi'e, Maliki, Hanbali dan Hanafi. Tetapi ini bukan bererti mereka menolak semua pendapat imam-imam mazhab Ahl al-Sunnah yang empat itu. Peristiwa ini merupakan kemuncak gemilang bagi gerakan *Islah* Perlis yang tidak dicapai di negeri-negeri lain.

Asas-asas aliran Ahl al-Sunnah yang sudah ada itu dikuatkan lagi dengan usaha beberapa orang tokoh yang datang kemudiannya ke Perlis. Di antara tokoh tersebut ialah Tuan Haji Ismail bin Haji Mahmud, atau lebih dikenali dengan nama Syeikh Noor al-Surur. Beliau dari keturunan Arab Hadramaut, dilahir pada

³⁴ Othman Ishak, *Fatwa Dalam Perundangan Islam*, (Kuala Lumpur: Fajar Bakti Sdn. Bhd., 1981), hlm. 45.

³⁵ Othman Ishak, *op.cit.*, hlm. 45.

³⁶ *Ibid.*, hlm. 87.

tahun 1911 di Pulau Pinang dan pernah menuntut di Mekkah selama 8 tahun, kemudian 8 tahun lagi di *Dar al-Hadith* di Madinah. Selepas itu berkhidmat sebagai hakim di Mahkamah Tinggi di Mekkah beberapa tahun, kemudian berhijrah dan menetap di Perlis. Di Perlis beliau mula mengajar di madrasah al-Falah, Mata Ayer sekitar tahun 1950-an. Kemudian beliau mengajar di beberapa tempat seperti di Hutan Lembah, Behor Mali, Behor Latih dan lain-lain. Akibat mengidap sakit mata pada tahun 1970-an, beliau menetap di Kampung Kersik, Mata Air dan terus mengajar di situ sehingga meninggal dunia pada tahun 1984.³⁷

Semasa hayatnya, Syeikh Noor memberi kepercayaan kepada seorang muridnya Haji Abdullah bin Mohd Ali dan pernah meminta beliau membantunya mengajar apabila beliau keuzuran.³⁸

Selain itu seorang lagi tokoh terkenal ialah Haji Abdul Rahman bin Haji Ismail, yang pernah mendapat pendidikan di Madrasah di Masyhur, Pulau Pinang dan di Madrasah Alawiyah Arau Perlis dan pernah menjadi guru bahasa Arab di Madrasah Alawiyah selama 25 tahun. Kemudian beliau dilantik sebagai Pemangku Mufti Perlis (1972-1984) di samping menjadi Imam Besar Masjid Alwi selama lebih kurang 15 tahun sehingga sekarang.³⁹

Selain tokoh-tokoh tersebut, ada lagi tokoh-tokoh lain yang masih hidup dan masih cergas menjalankan dakwah *Islahnya* seperti Ustaz Ahmad Yusoff Amin yang mendapat kelulusan B.A. dari Universiti al-Azhar dan M.A dari Universiti Temple, Amerika dan sekarang ini menjadi pensyarah di Institut Teknologi Mara (ITM) Cawangan Perlis, di Arau di samping menjadi seorang Ahli Jawatankuasa Fatwa Negeri Perlis. Beliau dianggap sebagai seorang tokoh muda Ahl al-Sunnah. Begitu juga dengan Ustaz Noordin bin Ismail salah seorang Ahli Jawatankuasa Fatwa Negeri Perlis, Haji Abdullah bin Mohd Ali anak murid kepada Syeikh Noor al-Surur dan pernah menjadi Yang Dipertua Persatuan *Islah* Perlis dan ramai lagi tokoh-tokoh lain.⁴⁰

Gerakan Sunnah Perlis seperti juga gerakan Islam yang lain, terpaksa berhadapan dengan cabaran dan masalah semasa. Walaupun ideologi *Islah* atau Sunnah telah termaktub dalam Undang-undang Tubuh Negeri Perlis, ia bukanlah merupakan satu jaminan kepada kesinambungan dan keberkesanan dakwahnya. Tokoh-tokoh mereka merasakan perlunya ditubuhkan satu organisasi yang teratur

³⁷ Temubual dengan Haji Abdullah bin Mohd Ali di Mata Air, pada 4.5.1995.

³⁸ Temubual dengan Haji Abdullah bin Mohd Ali di Pusat Islah Mata Air, pada 5.5.1995.

³⁹ Abdul Rahman bin Haji Abdullah, *op.cit.*, hlm. 42-43. Sewaktu penulis membuat kajian awal bulan Mei 1996 yang lepas didapati beliau dalam keuzuran kerana tua.

⁴⁰ Temubual penulis dengan tokoh-tokoh tersebut pada 4-5 Mei 1995.

di samping adanya kepimpinan yang berwibawa supaya program dakwah dapat dirancang dan disusun serta mampu menangani permasalahan. Organisasi itu akhirnya ditubuhkan hasil dari cetusan idea Syeikh Noor. Persatuan ini dinamakan "*Persatuan al-Islah Perlis*".

Persatuan al-Islah Perlis telah didaftarkan dengan rasminya pada 18 Mac 1965 dengan Perdaftaran Pertubuhan. Kemudian persatuan ini mendapat pengiktirafan dari Jabatan Hal Ehwal Agama Negeri Perlis pada 20 Ogos 1989. Sebagai sebuah organisasi yang mendokong kuat ideologi *Islah*, persatuan ini mempunyai undang-undang tubuh yang tersendiri. Fasal-fasal yang termaktub di dalamnya jelas sebagaimana aspirasi golongan *Islah*.⁴¹

Gerakan al-Islah Perlis terus berkembang dan mengadakan program melalui persatuan ini. Antara pemimpin tempatan yang terlibat secara langsung dengan *Persatuan Islah* ialah Datuk Ali Haji Ahmad,⁴² bekas Menteri Besar Perlis. Beliau adalah orang yang memainkan peranan penting dalam menggubal Undang-undang Tubuh Persatuan tersebut. Salah satu usaha terbesar yang dilakukan oleh *Persatuan al-Islah* ialah telah mengadakan Ijtima' Sunnah yang pertama pada 9-10 Februari 1986 di Masjid Alwi, Kangar, Perlis. Perhimpunan ini dirasmikan oleh Menteri Besar Perlis pada ketika itu Datuk Ali Hj Ahmad dan Y.T.M Tunku Raja Muda Perlis serta ditutup oleh Datuk Radzi Syeikh Ahmad, Timbalan Menteri Dalam Negeri ketika itu. Dianggarkan seramai dua ribu orang menghadiri Ijtima' tersebut terdiri dari perwakilan daripada Malaysia, Singapura, Indonesia dan Thailand. Sebanyak lima kertas kerja telah dibentangkan dalam perhimpunan itu.⁴³

Kejayaan Ijtima' Sunnah yang pertama ini telah disusuli dengan ijtima' yang kedua pada 17-18 Februari 1988 di tempat yang sama. Perhimpunan ini disertai oleh hampir seluruh gerakan *Islah* di Asia Tenggara termasuk Indonesia, Singapura dan Thailand. Ijtima' ini telah dirasmikan oleh Y.T.M Raja Muda Perlis selaku Yang Di Pertua Majlis Agama Islam Negeri Perlis. Dalam perhimpunan ini juga Menteri Besar Perlis pada masa itu, Dr. Abdul Hamid Pawanteh menyampaikan ucapannya dengan menjelaskan sikap dan pendirian kerajaan

⁴¹ Temubual dengan beberapa orang tokoh al-Islah seperti Haji Abdullah bin Mohd Ali, Haji Noordin bin Ismail dan Ustaz Ahmad Yusof Amin, pada 4-5 Mei 1995.

⁴² Meninggal dunia pada 12 Januari 1991.

⁴³ Ijtima' Sunnah Perlis, Lima Kumpulan Kertas Kerja, Anjuran al-Islah Perlis, (1986)

negeri terhadap kaum muda di Perlis yang jelas positif. Ijtima' kali kedua ini dihadiri oleh tiga ribu orang peserta.⁴⁴

Gerakan Ahl al-Sunnah Perlis yang bergerak melalui *Persatuan al-Islah* berpusat di Kampung Kersek, Mata Ayer mempunyai keahliannya yang agak ramai juga dan satu perkembangan terkini yang agak menarik, gerakan *Islah* Perlis kini mampu memiliki sebuah markas baru yang telah siap dibina dan boleh digunakan terletak di Jalan Mata Ayer, Perlis.⁴⁵

Menurut Haji Abdullah Hassan, seorang Ahli Jawatankuasa *Islah*, markas ini menelan belanja kira-kira RM780.000 hasil sumbangan dari pelbagai pihak, orang perseorangan dan ahli-ahli *Islah* termasuk juga Kementerian Pembangunan Luar Bandar. Markas ini dimanfaatkan sepenuhnya sebagai pusat pentadbiran dan juga pusat pengajian *al-Sunnah*.⁴⁶

Dakwah untuk menyedarkan dan mengembalikan masyarakat Perlis kepada ajaran al-Quran dan Sunnah sentiasa berjalan. Dakwahnya disampaikan melalui ceramah dan kuliah di masjid tertentu yang dapat menerima fahaman ini, misalnya Masjid Negeri di Arau, Masjid Alwi di Kangar dan juga di Pusat *Islah* Mata Ayer dan lain-lain lagi. Penekanan utama adalah dalam aspek Tauhid dan Ibadah serta pembasmian Bid'ah. Walau bagaimanapun *Persatuan Islah Perlis* tidak terlibat dalam gerakan atau menyokong mana-mana parti politik. Dengan sebab itu ahli-ahlinya terdiri dari pelbagai pihak seperti UMNO, PAS dan lain-lain lagi.

Ustaz Noordin bin Ismail menyebut bahawa gerakan *Islah* atau Ahl al-Sunnah Perlis tidak terlepas dari pelbagai masalah. Sikap pemerintah yang ada sekarang tidak sama dengan pembesar negeri dahulu yang begitu prihatin dengan masalah golongan Ahl al-Sunnah. Faktor ini menyebabkan kesukaran untuk mengubah mentaliti masyarakat. Beliau menganggarkan hanya 30% dari penduduk Islam Perlis yang menerima fahaman ini. Kawasan yang paling ramai ialah di bahagian Perlis Utara, manakala di bahagian Perlis Selatan yang bersempadanan Negeri Kedah masih kuat berpegang kepada mazhab Syafi'e.⁴⁷

Yang menjadi masalah besar kepada Ahl al-Sunnah Perlis pada masa ini ialah anak-anak mereka dan muda-mudi yang belajar di sekolah kerajaan, mereka diajar

⁴⁴ Temubual dengan Ustaz Noordin bin Ismail, pada 8.5.1996 dan Ustaz Hj Salleh bin Hj Abdullah pada 9.5.1996.

⁴⁵ Penulis sendiri pernah datang melawat pusat ini, pada 5.5.1995 dan pada 7 dan 8 Mei 1996.

⁴⁶ Temubual dengan Haji Abdullah Hassan oleh pada 5.5.1996 di rumahnya di Jalan Mata Air, Kangar Perlis.

⁴⁷ Temubual dengan Ustaz Noordin bin Ismail, pada 8.5.1996.

ajaran fekah mazhab Syafie dan tauhid sifat dua puluh ala tauhid *Asya'ariyah*. Sedangkan yang dipelajari itu berbeza dengan apa yang dihayati di rumah.

Apabila penulis mengemukakan masalah ini kepada tokoh-tokoh Ahli Sunnah Perlis, mereka berkata "Kami menyuruh anak kami menjawab soalan dalam kelas dan soalan peperiksaan sama seperti yang dipelajari di sekolah supaya mereka lulus cemerlang dalam peperiksaan, sedangkan amalan dan keyakinan hari-hari khususnya sewaktu di rumah, mereka mesti mengikut ajaran Ahl al-Sunnah yang berlainan dengan apa yang dipelajari di sekolah-sekolah kerajaan."⁴⁸

Dari jawapan di atas jelaslah bahawa anak-anak golongan Ahl al-Sunnah Perlis sekarang menghadapi dua kemungkinan. Pertama bagi anak-anak yang kedua-dua ibubapa dan keluarga mereka benar-benar mengetahui ajaran Ahl al-Sunnah dan mereka bertanggungjawab kepada anak-anak supaya mereka akan tetap terus mengamal dan menghayati ajaran tersebut, mereka terpaksa mengajar dan memberi pengisian yang secukup-cukupnya kepada anak-anak mereka serta menasihati mereka supaya jangan lari dari ajaran Ahl al-Sunnah dan jangan terpengaruh kepada ajaran di sekolah. Bagi golongan seperti di atas, mungkin mereka dapat mengawal anak cucu mereka dari terpengaruh dengan ajaran lain selain ajaran Ahl al-Sunnah cara mereka. Dengan itu anak-anak mereka boleh menerus dan menyumbang ajaran orang tuanya. Manakala bagi anak-anak yang ibubapa dan keluarganya kurang dalam ilmu pengetahuan mengenai ajaran Ahl al-Sunnah, tambahan pula mereka tidak ambil kisah tentang pegangan anak-anaknya bahkan diserahkan kepada anak-anaknya sendiri samada mahu menghayati ajaran Ahl al-Sunnah atau ajaran mazhab Syafi'e yang dipelajari di sekolah kerana dikira kedua-duanya betul atau dirasakan ajaran mazhab Syafi'e lebih ramai orang mengamalnya. Maka bagi anak-anak sedemikian, mungkin akan tertarik dengan ajaran yang mereka terima di sekolah dan terpengaruh kepada pandangan guru-guru yang bermazhab Syafi'e. Anak-anak seperti ini lambat laun akan lupa ajaran Ahli Sunnah dan terus meninggalkannya dan tidak mustahil di suatu masa nanti mereka akan mencemuh dan mengkritik ajaran Ahl al-Sunnah yang dipegang oleh ibubapa mereka dan menentanginya.

Penutup

Demikianlah pengenalan dan sejarah ringkas kelahiran dan perkembangan Ahl al-Sunnah Perlis dari awal pembentukannya sampai ke hari ini, yang jelas bahawa pengikut golongan ini ada kira-kira 30% sahaja dari penduduk Islam Negeri Perlis, manakala 70% lagi, mengikut mazhab Syafi'e. Apakah bilangan

⁴⁸ Temubual dengan tokoh-tokoh al-Islah seperti Haji Abdullah bin Haji Mohd Ali, Ustaz Noordin Ismail dan lain-lain pada 4-5 Mei 1995.

mereka yang sebanyak itu akan dapat dikekalkan atau ia akan merosot tahun demi tahun sehingga akhirnya mereka beramai-ramai akan mengikuti ajaran akidah ala *Asya'ariyah* dan menghayati fikah mazhab Syafi'e sama seperti umat Islam di tempat-tempat lain di seluruh Malaysia. Sama-samalah kita lihat kemudian nanti.